

VOSSABOKA

VOSSABOKA

Band 3

Gards- og ættesoge for Staup - Tøn

Åsmund Ohnstad, redaktør

Voss bygdeboknemnd, 2021

VOSSABOKA band 3, 2021

Ansvarleg redaktør: Åsmund Ohnstad

ISBN-nummer: 978-82-90074-14-7

Layout og trykk: Kai Hansen Trykkeri, Stavanger

Innbinding: Bokbinderiet Johnsen, Skien

Papir: MultiArt Silk

Skrift: Times 10/12

INNHALD

Gnr.	Side	Gnr.	Side
65	Staup..... 13	84	Almeland 307
66	Vestre Løno 24	85	Dukstad 320
67	Austre Løno..... 33	86	Øvsthus..... 359
68	Høyland 74	87	Lofthus 389
69	Hallsteinsberg..... 89	88	Lirhus 402
70	Ytre Afdal 95	89	Tvilde 425
71	Indre Afdal 101	90	Gjerdåker..... 452
72	Tvinno 108	91	Øvre Rykke 495
73	Gjøstein 127	92	Nedre Rykke..... 546
74	Hustveit 147	93	Endeve..... 572
75	Leidal..... 154	94	Melve..... 588
76	Leidal..... 164	95	Kvåle 599
77	Hefte 181	96	Helleve 608
78	Fletre 198	97	Vinjo 631
79	Grjotland 210	98	Vinjo 647
80	Nesheim..... 223	99	Fjose 659
81	Oppkvitno..... 235	100	Tøn 670
82	Nedkvitno 257	101	Tøn 678
83	Hegle 285		

s. 5 i innholdslista, manglar gnr. 101 Tøn

Det står? Har jeg misforstått

FØREORD

I 1962 vart Voss bygdeboknemnd oppnemnd av Voss kommune. Denne nemnda skulle vidareføra arbeidet med å skaffa Voss kommune gards- og ættessoger for heile kommunen. Det vil seia for dei tre tidlegare kommunane, Evanger, Voss og Vossestrand. Nemnda har gjeve ut ætte- og gardssoger for Evanger og Vossestrand, ålmennsoge for Voss og bok om stølane i Voss. Alt i 1970-åra diskuterte nemnda å revidera Vossaboki, Lars Kindem sine fire band om dåverande Voss kommune. Arbeidet kom ikkje i gang, ikkje minst av di ein ikkje såg å ha økonomisk grunnlag for å våga seg på dette storarbeidet.

I 2014 bestemte bygdeboknemnda seg for å prøva få til eit økonomisk grunnlag for prosjektet, og i 2015 vart arbeidet med Vossaboka sett i gang. Noko er alt finansiert, men me er avhengige av å få selt bøkene etter kvart som dei vert ferdige for å koma i mål. Me reknar med at det vert 6-8 bøker i alt. Av di me må starta salet før alle bøkene er ferdige, kan me heller ikkje ha nummerering slik me til dømes har i bøkene for Vossestrand. Me viser difor til gards- og bruksnummer eller til område.

Skriftnemnda har måtta gjera ein del val:

Kindembøkene skulle reviderast. Dei gamle bøkene hadde for mange personar uteletne og ættelistene var for mykje knytte opp mot dei som eigde gardane.

Me ville ha ei gardsoge fram mot vår tid. Gardssoga i dei gamle bøkene går fram til midt i 1930-åra, og opplysningar om gardane fram til den tid finn ein der. Bøkene er ikkje lenger i sal, men er å finna digitalt på Nasjonalbiblioteket. Gardssogedelen i dei nye bøkene startar difor i 1930-åra.

Ættelistene ynskjer me å føra så langt fram me kan. Men når det gjeld siste tida fram mot våre dagar, har me ikkje tilgang på alt av offentleg materiell og er difor avhengige av kva folk opplyser.

Vangen med byggefelta vil koma til slutt i egne bøker. Voss bygdeboknemnd vil retta stor takk til alle som har støtta oss i arbeidet økonomisk: Vekselbanken, Voss Sparebank, Sparebankstiftinga Hardanger og Voss sogelag. Stor takk òg til Voss ættesogelag, Voss sogelag og einskildpersonar som hjelper til med det praktiske arbeidet. Voss herad yter tilskot til prosjektet med midlar frå bygdeboknemnda sine tidlegare arbeid og med direkte tilskot.

Voss bygdeboknemnd

Anita Jordalen

Knut Farestveit

Gunnar Hemre Ringheim

Trygve Dugstad

Ørjan Myrmel, varamedlem

Audhild Rygg - leiar

Deltakarar i arbeidet

Boka har ein slektsdel og ein gardsdel. Eit grunnlag for slektsdelen i boka har vore Lars Kindem sine bygdebøker, Vossaboki bd. 2 og 3, utgjevne i 1935 og 1936. Me har skrive av brukarlistene og personopplysningane i den boka.

Voss bygdeboknemnd fekk i 1970-åra utført eit arbeid med tanke på revisjon og nyttgjeving av bygdebøker for Voss. Roald Lyngvær gjekk gjennom Lars Kindem sine bygdebøker, utførte kontrollar og samla inn fleire opplysningar. Dette materialet har me gjort oss nytte av.

Eit av medlemene i bygdeboknemnda, Gunnar Hemre Ringheim, har gjennom mange år samla og ordna slektsopplysningar og opplysningar om gardar og gardsbruk. Dette gjeld houvdsakleg tidsromet frå kring 1800 til 1910-30. Me har fått høve til å nytta desse opplysningane.

Redaktøren har samarbeidd tett med Voss ættesogelag. Ættesogelaget vart skipa i 1989. Ein ville skipa eit lag for folk som dreiv med slektsgransking. Det vart valt leiar, tre styremedlemer, revisor og medlemer til valnemnd.

Laget har hatt stor glede av alt arbeidet som Johannes og Liv Ystaas gjorde. Frå 1980-åra og utover gjekk dei gjennom kyrkjebøkene for Voss prestegjeld frå kring 1710 og framover. Dei tok avskrifter av døypte, konfirmerte, vigde, inn- og utflytte og døde i Voss prestegjeld fram til kring 1800. Frå kring 1800 til kring 1910 tok dei avskrifter for Vangen sokn. Materialet vart registrert på edb, og det vart teke alfabetiske utskrifter i alle kategoriar. Desse listene er til disposisjon for ættesogelaget sine medlemer på deira møte. Materialet gjer det enkelt å finna att personane i ulike høve, som fødde, konfirmerte, vigde, som familiefolk og i andre livssituasjonar.

Medlemer i ættesogelaget har gått kritisk gjennom manuskriptet og kontrollert det mot det kjeldematerialet som dei rår over. Gunnar Gjerme og Jan Egil Mandelid har arbeidd mykje med dette. Andre medlemer i laget har òg ved høve bidrege med opplysningar. Når ættesogelaget har avslutta sine undersøkingar, har dei sendt manuskriptet tilbake til redaktøren, som har skrive inn alle nye opplysningar.

Personopplysningane frå 1920-30 og framover til vår tid har me skaffa oss ved å dela ut spørjeskjema til husstandane. Me er avhengige

av at opplysningane som er gjevne, er rette og fullstendige. I nokre høve har personar sagt at dei ikkje ynskjer å ha mange opplysningar om seg i boka, og dette respekterer me. Basisopplysningar som er i offentlege register, vert derimot alltid tekne med. Redaktøren har delt ut spørjeskjema til dei fleste husstandane. Audhild Rygg har delt ut spørjeskjema i området Nedkvitno-Hegle.

Bedrifta Logolink A/S, Voss har laga til heimeside for prosjektet, og dei har lagt til rette for elektronisk innsending av spørjeskjema. Familiane har levert skjema enten på papir til redaktøren sitt kontor, eller dei har levert skjema elektronisk. Redaktøren har seinare henta inn dei opplysningane som manglar ved bruk av telefon eller e-post. Me har sendt ut ved epost eller på papir tekstane om familiar og eigedomar til dei fleste. Me har fått tilbakemeldingar og gjort nødvendige endringar.

Redaktøren av boka, Trygve Dugstad og Kjell Erik Herheim, har vurdert bilete som skal nyttast. Voss folkemuseum har tidlegare overteke Widerøe sine flyfoto av gardane frå 1955 og Fjellanger-Widerøe sine flyfoto frå 1963. Desse er nytta i boka. Kjell Erik Herheim har funne fram aktuelle bilete, tilpassa desse med omsyn til storleik og kvalitet og levert dei til redaktøren. Vidare har

Svein Ulvund stelt sine bilete til disposisjon, slik at kvar gard har eit bilete frå nyare tid. I tillegg har me teke med nokre bilete av eldre folk, arbeidssituasjonar og anna.

Kjeldemateriale

Ei viktig kjelde har vore Arkivverket/Digitalarkivet sine opplysningar på internett. Her finn ein kopiar og avskrifter av kyrkjebøker, folketeljingar fram til 1910, opplysningar om emigrantar, eigedomar, arveskifte og fleire. Medlemer i ættesogelaget og redaktøren har hatt tilgang til folketeljinga 1920.

Ei anna kjelde har vore foreininga «Slekt og data» sitt register på internett, DIS Gravminner, gravminne frå dei fleste gravstadene i Noreg. Voss kyrkjelege fellesråd har internettsider der me finn oversyn over alle gravlagde i nyare tid. Like eins har skattelistingane for åra 2001 til 2009 vorte nytta.

Opplysningane om eigedomane er dels henta frå L. Kindem og dels frå andre stader. Arkivverket har opplysningar om eigedomsoverdraging i eldre

tid. Statens kartverk har på nettsidene www.seeiendom.no opplysningar om eigedomane i nyare tid. Telefonkatalogen www.1881.no har opplysningar om eigarskifte i nyare tid. Me har nytta nettsidene www.vossakart.no. Vidare har me nytta matrikkelen 1950 som er på internettet (UiO).

Voss bibliotek har ei stor samling av lokalhistorisk litteratur og noko kjeldemateriale. Her finn me bygdebøker og dei fleste lokalhistoriske bøker og skrifter. Her er avskrifter av folketeljingar og av kyrkjebøkene for Voss prestegjeld, Vangen sokn, ordna etter gard.

Framstelling og skrivemåte

Opplysningane om familiar og enkeltpersonar er hovudsakleg førte på gards- og bruksnummer. Det er lagt vekk på å visa flytting innanfor bygda. Ein familie har ei hovudoppføring der dei budde lengst. Viss dei har butt fleire år ein annan stad, vil det gjerne vera ein merknad om det på den aktuelle staden, men då med avgrensa opplysningar om familien.

Alle ektepar og sambuarpar har utheva skrift. Viss foreldra ikkje har butt saman, så er den eine personen utan utheva skrift. Alle born er førte opp med ein bokstav. Viss barnet er nemnt i ein merknad, så er det gjort i vanleg tekst.

Skrivemåten av personnamn i kyrkjebøkene varierer mykje frå tid til tid. Prestane skreiv personnamna svært ulikt og ofte på ein måte som verka framand. Me har valt å nytta den skrivemåten som Lars Kindem nytta i sine bygdebøker 1933-38. Han la vekt på munnleg form og dagleg bruksmåte. I nyare tid har me skrive namna slik dei er skrivne i ulike kjelder.

Denne boka har òg ein gardsdel. Her er tekstar som hovudsakleg gjeld tida etter at L. Kindem gav ut sine bygdebøker i 1930-åra. Redaktøren har henta inn desse opplysningane enten ved utdeling av spørsmål eller ved personlege samtalar.

Statens kartverk har i seinare år gjort ei vurdering av skrivemåten av gardsnamn og gjort vedtak. I tilfella med ny skrivemåte har me sett den gamle skrivemåten i parentes ved byrjinga av kvar gardsdel.

Åsmund Ohnstad, redaktør

Forkorting og ordforklaring

b.	Bustad
benkedrivar	Ein som leigde eit areal for skiferdrift av ein grunneigar
bnr.	Bruksnummer
bygsel	Avtale om retten til å leiga og driva eit gardsbruk.
c.	Cirka
co.	County (administrativ eining i USA)
ek.	Enkje
em.	Enkjemann
e.o	Ekteskapet oppløyst
gbr.	Gardbrukar
GfV	Gamalt frå Voss
gm	Gift med
g2m	Gift andre gong med
gnr.	Gardsnummer
husmann	Ein person som leigde eit stykke jord hjå ein bonde. Leigeavtalen gjaldt ofte i husmannen si levetid
innerst	Leigebuar
landskyld	Årleg avgift som vart betalt til jordeigaren
løysingsrett	Rett til ein eigedom (odelsrett)
sb.m	Sambuar med
sb.o	Sambuarskapet oppløyst

Staup

Gardsnummer 65

Staup grensar til Saue, gnr. 64, i sørvest og Løno, gnr. 66 i sørvest og i aust og til Løno, gnr. 67 i nordaust. Garden har utmark ovanfor innmarka i fjellsida opp mot Lønahorgi. Det var ein flor i det området. Sommarstøl var Breiming, høgare oppe mot Lønahorgi.

Garden vart rydda i gamal tid, i mellomalderen eller før. Han låg aude i mange år etter svartedauden i 1349/50. Den første brukaren etter det er nemnd i 1645. På 1600-talet vart Staup brukt av folka på Austre Løno gnr. 67, for ei kjelde frå 1723 fortel at garden vart rydda av folka der.

Det var lenge berre eit bruk på Staup, men i 1877 og 1898 vart to småbruk frådelt. Brukarane av garden, og i nokre tilfelle andre bønder, har frå litt før 1700 og framover vore eigarar.

På Staup var det helleberg på bruk 1 og 3 på både sider av den vesle elva, Stilnè. Fleire av dei som budde på Staup arbeidde der.

Staup 65/1

Kring 1960 var her 12 dekar dyrka jord, 25 da. anna jordbruksareal og mykje utmark i sameige. Dei hadde då hest, 3 kyr, 1 ungdyr og 13 sauer. Det var eit stølstræ på Breiming. Her er ikkje lenger sel, og stølen vart truleg ikkje nytta etter 1930.

Det var drift med husdyr til ut i 1970-åra. Dei siste åra hadde dei berre sauer. Dei hadde òg ei tid ei eller to geiter og gris. Om sommaren beitte dyra i marka ovanfor garden. Stølen Breiming vart ikkje nytta.

Det er god jord her, og dei plukka mykje bær, blåbær, heggebær og nyper. Dei laga gjerne syltetøy av bæra. Noko mjølk vart levert på Vangen, og resten nytta dei sjølv. Anders Grindeland, f. 1896, stod for slaktinga sjølv. Dei laga ulike typar mat, som til dømes smalahovud, pinnakjøtt, rullepølse, mårpølse og anna.

Pinnakjøtet vart røykt, og det var av god kvalitet. Dei dyrka heile tida poteter og litt grønsaker, gjerne gulrøter. Det var lite grann korndyrking i 1940-åra.

Det kom nye eigarar til garden i 2005, og dei sette i gang eit omfattande restaureringsarbeid. Bygningane og tunet er tekne vare på slik som det var før i tida. Alle husa er no vølte og sette i stand. Løa er pussa opp og modernisert innvendig, og her er plass til 70 personar. To av husa er utleigehus, og her er 18 sengeplassar. Restaureringsarbeidet starta i 2005 og varte til 2016. Arbeidet er hovudsakleg gjort med eigne midlar, men med tilskot frå fleire offentlege og private føretak. Staden er i dag nytta til samkomer av ymse slag, slik som bursdagar, konfirmasjonar og bryllaup.

Olav Larsson Løne c.1667-1739 frå Løno gnr. 67

g1m **Brita Arnesdotter**

g2 1736 m **Reiend Oddsdotter Helgeland** 1712-1799 frå Helgeland, Vossestrand

a Anna	c.1698-1744	g 1737 m Gulbrand Mølstersteig, Mølstersteigen
b Knut d.e.	c.1699-1752	neste brukar
c Lars	c.1704-1726	
d Rannveig	c.1706-1749	g 1734 m Gitle Knutson Repål, Repål 102/1
e Knut d.y.	1708-1770	g 1753 m Brita Eilevsdotter Flage, Lekve 47/ plasset Rognsgarden
f Magnhild	1713-	g 1739 m Nils Bergeson

g Brita	1738-	g 1761 m Eirik Jonson Jordalen, Jordalen, Vossestrand

Olav kjøpte garden i 1694. Reiend gifte seg opp att med Elling Ingebrigtsen Een, sjå Æn 62/3.

Knut Olavson Een c.1699-1752 frå her

g 1731 m **Gjertrud Styksdotter** c.1706-1797

a Eirik	1731-1778	neste brukar
b Brita	1735-	g 1773 m em. Mikkjel Johannesson Brekke/ Honve, Kvitno 122/2
c Styk	1737-1741	
d Olav	1740-1800	g 1761 m Borghild Mattisdatter Lekve, Oppkvitno 81/1

e Magli	1742-	g 1782 m em. Sjur Olavson Løno, Løno 67/4
f Anna	1744-	g 1784 m Olav Nilsson Bryn, Ullestadteigen 233/1
g Styrk	1746-	konfirmert 1763, var då tenar på Løno
h Rannveig	1749-	g 1773 m Anders Larsson Glimme, Tungeteigen, sidan Taulen

Knut var på Æn 62/3 i åra 1732-1739, og borna a-c vart fødde der. Dei andre vart fødde her på Staup. Enkja dreiv truleg garden vidare etter Knut.

Eirik Knutson Staup 1731-1778 frå her

g 1755 m **Gjertrud Olavsdotter Opheim** 1730-1813 frå Oppheim gnr. 3

a Knut	1757-1838	neste brukar
b Kari	1760-1844	g 1795 m Per Larsson Ulvund, Staup 65/ husmenn
c Olav d.e.	1762-1847	ugift, b. Staup
d Lars	1766-	g 1806 m Guro Andersdotter Vinje, Helleve 96/ husmenn
e Gudleik	1770-1853	g 1800 m Gjertrud Persdotter Ygre, gbr, Bergo, sidan Bø 108/1
f Olav d.y.	1773-1814	lærar
g Anders	1777-1809	var grenader i Bergenhusiske regiment, deltok i krigen mot Sverige 1807-1809, død i Fredrikstad

Eirik fekk garden i 1758. Gjertrud dreiv bruket vidare.

Knut Eirikson Staup 1757-1838 frå her

g 1787 m **Gudve Monsdotter Ettesvoll** 1753-1826 frå Ettesvoll, Vossestrand

a Gjertrud	1788-1865	g 1811 m gbr. Ivar Person Skjerpe, Skjerpe 56/1
b Eirik	1791-1791	
c Eirik	1792-1880	neste brukar
d Mons	1794-1876	g 1826 m Gunnvor Knutsdotter Løno, gbr. Litlere 209/2, seinare Mølster 46/ husmenn

Knut fekk garden i 1787.



Garden Staup. Foto: Voss Folkemuseum

Eirik Knutson Staup 1792-1880 frå her

g 1811 m **Brita Persdotter Skjerpe** 1787-1875 frå Skjerpe

a Gudve	1812-	g 1835 m Olav Bårdson Een, Grjotland 79/ plasset Riftahagen, utvandra til Amerika i 1857
b Knut	1814-1836	
c Per	1817-	
d Barbrå	1819-1909	ugift, budde her, til sist på Vossestrand
e Anders	1822-1891	neste brukar
f Arnfinn	1824-1897	brukar her, sjå nedanfor
g Marta	1826-	utvandra til Amerika i 1850
h Ingebjørg	1831-1915	g 1855 m gbr. Bjarne Sylfestson Tvinne, Tvinno 72/2, sidan Løno 67/4

Eirik fekk garden i 1810. Han og kona fekk kår då sonen overtok.

Anders Eirikson Staup 1822-1891 frå her

Anders hadde skøyte på garden i 1855-1865. Deretter let han garden til bror sin og budde ei tid som kårmann her. Anders og broren var snikkarar og sær s flinke smedar. Dei arbeidde mest dørlås, kistelås og kledekister. I 1880 kjøpte Anders eigedom på Løno, 67/3, bygde hus og budde der til han døydde.

Arnfinn Eirikson Staup 1824-1897 frå her

g 1870 m **Guro Åmundsdotter Gjøstein** 1848-1927 frå Gjøstein 73/
husmenn

a Eirik	1872-1928	neste brukar
b Oddmund	1874-1964	brukar her, sjå nedanfor
c Olav	1882-	ugift, utvandra til Illinois, USA i 1899
d Per	1885-1967	ugift, småbrukar, Staup 65/3

Arnfinn fekk bruket av broren i 1865. Garden vart skøytt på eldste sonen, og ein større gardpart vart delt frå til sonen Oddmund. Guro vart buande på garden i kårhuset saman med sonen Per. Arnfinn var ein sær s dugande smed. Av ein gudbrandsdøl, kalla maskin-Hans, lærde han og broren å laga treskemaskiner og vasshjøl, og dei arbeidde fleire slike.

Eirik Arnfinnson Staup 1872-1928 frå her

Eirik utvandra til Illinois, USA i 1893, men kom heim att og fekk garden i 1898. Han var brukar til han døydde.

Oddmund Arnfinnson Staup 1874-1964 frå her

Oddmund budde på bruk 3. Han og broren Per arva bruk 1 etter bror deira. Seinare overtok Oddmund heile bruk 1, men han budde aldri her. Bruket vart pakta bort i 1932 og selt året etter.

Anders Vikingson Grindeland 1896-1980 frå Grindaland 344/1, Vossestrand
g 1929 m **Gudveig Larsdotter Sleen** 1910-1994 frå Slæn 331/2, Vossestrand

a Ranveig	1929-	gm maskinførar Finn Johansen, b. Drammen
b Dagny	1931-	gm målarmeister Ole Kristian Hovda, frå Oslo, b. Drammen

c Valbjørg	1934-2014	g 1958 m gbr. Nils Monsson Ramsøy, Giljarhus 328/3, Vossestrand
d Liv	1936-2003	gm verkstadarbeidar Arne A. Reime, b. Ullestad
e Borghild	1943-	ugift, arbeidde ved spesialskeule, b. Drammen
f Gerd Astrid	1946-	gm røyrleggjar Magnar Hansen, b. Seimsfeltet
g Marit	1949-	b. Oslo

Anders kjøpte bruket i 1933. Dei budde før det på Bryn. I 1979 flytte Anders og kona til dottera på Ullestad. Døtrene overtok bruket i 1974, men selde det seinare.

Geir Løne, frå Løno 67/1 gm **Synnøve Selje**.

Geir og Synnøve kjøpte Staup i 2005. Då hadde det ikkje butt folk her sidan 1970-åra.

Staup 65/2

Eigedomen vart frådelt bruk 1 i 1877. Våningshus og løe vart bygde kring 1900. Kring 1960 var her 6 dekar jordbruksareal. Det var nokre sauer på småbruket til kring 1976. Kring 1950 og før var her òg eit par kyr og gjerne gris. I eldre tid fann dei vatn i elva. I seinare tid er det bora etter vatn og bygt brunn.

Før 1900 stod det ei oppgangssag ved elva. Den vart etter 1900 ombygd til smie og seinare vedhus. I 2007 vart bygningen restaurert tilbake til saghus, slik det såg ut i eldre tid.

Aslak Torbjørnson Gjerskvål 1838-1892 frå Gjerskvål 60/3
g 1876 m **Synneva Håkonsdotter Opkvitne** 1856- frå Oppkvitno 81/ pl.
Ukvitshaugen

a Jorunn	1876-1931	g 1905 m gbr. Olav Aslakson Flatekvål, Flatekvål 61/1. G 1914 m småbrukar Olav Knutson Flatekvål, Flatekvål 61/5
b Torbjørn	1878-1961	reiste til Amerika i 1899, kom tilbake og kjøpte Reime 143/2. G 1928 m Kristense Bartolomeusdotter Gjerde, sidan skiferarbeidar, Gjerde 54/1
c Hans	1882-1914	skiferarbeidar, utvandra til Amerika i 1902, g der m Anna Knutsdotter Flatekvål, frå Flatekvål 61/17
d Lars	1892-	utv. til Am. i 1904

Aslak kjøpte eignedomen i 1877, var ein flink smed og arbeidde sigdar, ljaar, sakser og anna. Han var òg eigar av ei oppgangssag. Dei tre eldste borna vart fødde på Gjerdskvål. Familien skreiv seg for Løne. Synneva gifte seg opp att, sjå nedanfor.

Hans, kona og tre born var på veg tilbake til Norge i 1914, då skipet deira, «Empress of Ireland», forliste. Heile familien omkom saman med fleire enn tusen andre.

Ek. Synneva Håkonsdotter Opkvitne 1856- frå Oppkvitno 81/ pl.

Ukvitshaugen

g 1894 m **Sivert Andreas Ingvald Nilsson Liadal** 1868-1901 frå Ørsta, Sunnmøre

a Nils 1895-1896

b Nils Andreas 1896-

c Ingvald Johan 1899-

d Sivert Martin 1901-

Sivert kom til Voss som garvarlærling på Vangen. I 1897 selde han eignedomen her og flytte til Bergen. Der fekk han arbeid på ein margarinfabrikk. Dei to eldste borna vart fødde på Løno. Synneva utvandra med fire søner i 1904, men kom tilbake til Voss litt før 1910 for at dei to yngste sønene skulle verta konfirmerte her. Etter nokre år reiste ho tilbake til Amerika og vart gift der for tredje gong. Dei budde i Lansing, Iowa.

Nils Nilsson Øye 1869-1959 frå Stamnes i Vaksdal

g 1894 m **Ingebjørg Jakobsdotter Myster** 1870-1938 frå Myster i Vaksdal

a Nils 1895-1981 skiferarbeidar, utvandra til Iowa, USA i 1915, flygar

b Johannes 1897-1972 utv. til Iowa, USA i 1916, fabrikkarbeidar

c Ragnhild 1899-1991 g 1921 m lærar Nils Mattisson Dugstad, Palmafossen, seinare Flatekvål 61/6

d Dorteia 1903-1998 neste brukar

e Harald 1908-1991 g 1938 m Brita Lid, lærar og organist, b. Gvarv i Telemark

f Gunnar 1911-1996 g 1939 m Brita Kvarme, skiferarbeidar/ militærtilsett, b. Nedkvitno 82/6

Ekteparet kom til Voss som nygifte, og Nils hadde fyrst hellebenk på Saue. Han arbeidde seinare i trevarebedrift på Palmafossen og Vangen til han var 80 år. Nils kjøpte eiegenomen med sagbruk på Lønahaugen i 1897.

Dorthea Nilsdotter Øye 1903-1998 frå her
g 1935 m **Georg Andersson Gjøstein** 1904-1998 frå Gjøstein 73/3

a Arne 1936- gm Ingrid Lilleslett, frå Hol, lærar, b. Gol

Dorthea og Georg overtok bruket etter far hennar i 1956. Georg var i fleire år skreddar på Vangen og Vaksdal før han begynte her for seg sjølv. Seinare var han sagbruksarbeidar på Vangen. Som pensjonist tok han opp att skreddaryrket og sydde mange vossabunader for menn. Han var felespelar og æresmedlem i Voss Spelemannslag.



Staup, bruk 2. Foto: Kjell Herheim 2020

Arne Gjøstein, f. 1936, frå her g 1968 m **Ingrid Lilleslett**, f. 1944, frå Hol.

Arne overtok eigedomen i 1991. Han var lærar ymse stader i landet og på Vangen skule. I 1970 flytte familien til Gol. Han og Ingrid har borna Johanna, f. 1969, Georg, f. 1970 og Hallvard, f. 1973.

Georg Gjøstein 1970- frå Gol
sb med **Elin Merete Blixhavn** 1976- frå Egersund

a Agnes Ea 2017-

Georg overtok eigedomen i 2005 og budde her 2010-2017. Han er leiar for Hardangervidda Fjelloppsyn. Familien bur no på Ål.

Staup 65/3

Eigedomen vart frådelt bruk 1 i 1898. I 1954 var her nytt bustadhus, vedhus, løe med fjøs, smie og kårhus som stod på bruk 1. Innmarka var kring 21 dekar, og i lia ovanfor Staup var det ein skogteig på kring 60 dekar.

Oddmund Arnfinnson Staup 1874-1964 frå Staup 65/1

Oddmund reiste til Amerika i 1893, men kom heim att og kjøpte dette bruket i 1908. Han dreiv bruket fram til 1931. Då vart han sjuk og budde sidan i Sunnhordland. Oddmund og broren Per arva bruk 1 etter Eirik i 1928. Oddmund overtok seinare heile bruk 1.

Per Arnfinnson Staup 1885-1967 frå Staup 65/1.

Per reiste til Amerika i 1904 og kom til Capron, Illinois. Der var han hjå syskenbarnet sitt, Marta, som var gift med Knut Løne. Marta var då enkje, og då ho selde garden, drog Per til Montana. Der kjøpte han seg land, 640 dekar, men selde det og drog tilbake til Noreg same året, i 1908.

Per budde lenge saman med mora i kårstova på bruk 1. Han arva bruk 1 saman med broren Oddmund, men makebytte og overtok dette bruket, bruk 3, i 1932. Stovehuset brann ned i 1950. Han bygde eit nytt lite hus ovanfor helleberget og budde i det. Kring 1960 flytte han til Heradsgarden.



*Per Staup, 1885-1967, var ein snartur i Amerika, men budde sidan på Staup.
Foto: Mathias A. Mølster*

Staten ved Hordaland landbruksstyre overtok fyrst bruket på grunn av at Per Staup ikkje hadde arvingar.

Lars E. Sausjord, f. 1920, Sausjord 284/2

Lars overtok bruket i 1972 etter odelssøksmål. Sonen Eirik overtok eigedomen seinare.

Staup 65/ plassen Myrane

Plassen låg truleg under helleberget til brukt 3. og litt nordover mot bruk 1.

Jon Person Skjerpe 1796-1859 frå Skjerpe 56/1

g 1835 m **Gunnvor Styksdotter Tøn** 1801-1858 frå Tøn 100/1

a Barbrå 1835-1852

b Per 1844-1928 gm Kari Johannesdotter Torblå, skreddar,
treskjerar og felemakar, b. Ulvik

Dei hadde først plass på Skjerpe, men kom her kring 1840 og fekk feste på plassen Myrane av svogeren. Per budde ei tid på bruk 1 etter at foreldra døydde.

Staup 65/ husmenn

Bård Torgeirson gm **Ingebjørg Monsdotter**

Dei fekk dottera Anna, f. 1730.

Ingebjørg Åmundsdotter Staup

g 1732 m **Nils Tolleivson Bryn**

Ingebjørg budde truleg her ved giftarmålet.

Per Larsson Ulvund 1760-1824 frå Stalheimsøy, Vossestrand

g 1795 m **Kari Eiriksdotter Staup** 1760-1844 frå Staup 65/1

a Brita 1795-1830 g 1822 m Knut Mikkjelson Skjeldal, b. ei tid på
Avaldsnes, sidan Svanga 394/ husmenn, Evanger

Per var husmann og smed. Han arbeidde mellom anna beslag og lås til kleskister. Kari døydde som legdslem.

Løno

Løno ligg ved Lønavatnet, nord for Saue og sør for Høyland. Løno er gjerne kalla ein namnegard. Opphavleg var her ein gard og eitt bruk. Det er nemnt ein brukar på Løno i 1521, og då har det truleg vore drift på Løno i alle åra etter svartedauden i 1349/50. Kring 1600 vart her to brukarar, og seinare vart garden rekna som to gardar, Vestre Løno gnr. 66 og Austre Løno gnr. 67.

Løno – gardsnummer 66 (Vestre Løno)

Vestre Løno har grense mot Staup i vest, mot Saue, gnr. 64 i sør, mot Lønavatnet i aust og mot Austre Løno, og Staup i nord. Det er utmark i fjellsida opp mot Svartahorgi litt nord for Austre Løno. Stølen til garden er Bergsstølen, som ligg kring 2 km nordaust for Staup. Dei har tidlegare òg brukt Nyestølen noko lenger oppe. Eit område i Lønaøyane høyrer til garden.

Det er nemnt to brukarar på Løno fyrste gongen i 1603, og det er då rimeleg å tru at det var ein brukar på Vestre Løno og ein på Austre. Det var ettt bruk på Vestre Løno fram til 1847, då bruk 3 vart frådelt. I åra 1885 til 1923 vart fleire småbruk frådelte. På 1600-talet var det brukaren sjølv, eller andre bønder på Voss, som var eigarar. Frå tidleg på 1700-talet har brukarane sjølve vore eigarar.

Em. Sjur Olavson Store Høn c.1658-1734

a Marta	1706-1777	g 1741 m Nils Johannesson Hyljarås, Hyljarås, Evanger
b Øystein	1710-	g 1735 m Kari Mikkjelsdotter Bø, Skjelde

Sjur fekk bygsel i 1691. Sjur var først gift med Ingebjørg Botolvsdotter og deretter med Marta Ingebrigtsdotter Vetla Hyrt. Dei budde då på Stora Høn, sjå der.

Løno 66/1

Bruket i nyare tid

I 1891 vart gardstunet og mykje jord frådelt, og det vart bruk 4. Gardstunet på bruk 1 vart då flytt kring 200 meter mot sør.

Kring 1960 var her 35 dekar dyrka jord, anna jordbruksareal og 100 da. produktiv skog. Dei hadde då hest, 5 kyr, 4 ungdyr, 2 griser og 25 sauer. Sommarstøl var Bergsstølen i fjellsida under Lønahorgi.. Dei var på stølen med kyr som vart mjølka fram til kring 1950. I 1996 vart det kjøpt eit stølstræ der frå bruk 3

Det var mjølkeproduksjon på bruket fram til 2016. No er her framleis sauehald. Silo vart bygt tidleg i 1950-åra, og dei la i silo fram til 2015. Etter det har dei berre nytta rundballar.

Første traktoren vart kjøpt i 1966, men her var hest fram til 1978. Motor-slåmaskin vart kjøpt i 1955, fôrhaustar i 1970. Ballepresse vart skaffa i 2004. Det vart bygt flor i 1955, og i 2019 vart det bygt ein ny. Denne er tilpassa for sauehald, og her er plass til 150 dyr. Reiskapshus vart sett opp i 2009. Dei bygde nytt bustadhus i 1964. Det vart påbygt i 1993, og det har to husvære. Vassforsyninga er frå eigen brunn. Nils, f. 1960, har ved sida av gardsdrifta hatt arbeid i byggje- og anleggsbransjen.

Em. Anders Eirikson Løne c.1667-1751 frå her
g 1741 m ek. **Anna Øysteinsdotter Skjelde** c.1674-1743 frå Skjelde

Anders fekk bygsel i 1721 og skøyte i 1724. Han selde bruket i 1734. Anna var første gongen gift med Per Monsson. Dei hadde tre born og budde på Skjelde. Andre gongen vart ho gift 1722 med Åmund Brynjulvson Bø. Dei hadde ein son og budde på Skjelde.

Nils Eirikson Løne, c.1671-1767, frå her g 1709 m **Kristi Halvorsdotter Sausjord** , c.1679 -1764, frå Sausjord.

Nils eigde eit bruk på Sausjord, Vossestrand, og familien budde først der. I 1734 kjøpte han bruket her på Løno av bror sin, og i 1736 selde han det på Sausjord. Ni born vart fødde i åra 1709-1723. Sjå Sausjord, Vossestrand om familien.



Vestre Løno sett frå Blikberg. Foto: Mathias A. Mølster

Olav Nilsson Løne 1715-1781 frå her
g 1757 m **Katla Jonsdotter Bidne** c.1715-1809 frå Bidne gnr. 257,
Vossestrand

Olav fekk bruket i 1757.

Nils Knutson Bidne, f. 1758, frå Bidne gnr. 257, Vossestrand g 1786 m
Gjertrud Brynjulvsdotter Ure, 1759-1857
Nils kjøpte garden kring 1781. Han makebytte i 1793 med neste brukar og kom
til Ytre Afdal. Sjå der om familien.

Brynjulv Halldorson Afdal 1764-1833 frå Afdal 70/1
g 1785 m **Ingjerd Knutsdotter Kvarme** 1759-1823 frå Indre Kvormo,
Vossestrand
g 1824 m **Ragnhild Olavsdotter Høyland** 1783-1848 frå Høyland 68/1

a Brita	1786-1876	g 1821 m gbr. Knut Davidson Saue, Løno 67/ husmenn
b Halldor	1788-1859	neste brukar
c Knut	1791-1833	g 1816 m ek. Marta Nilsdotter Bjørke, gbr, Bjørke 158/1
d Guri	1795-1889	g 1822 m gbr. Ivar Larsson Løne, Løno 67/4
e Lars	1798-1845-	g 1823 m Eli Styksdotter Norekvål, gbr. Gjøstein 73/3, sidan til Nordland
f Marta	1801-1853	g 1819 m gbr. Olav Aslakson Eimstad, Eimstad 239/1

Brynjulv var først brukar på Ytre Afdal, men kom hit i 1793 etter makebyte med førre brukar. Sonen Knut vart fødd på Leidal. Brynjulv var brukar til sonen overtok. Brynjulv og kona flytte då til plassen Blikberg (66/3).

Halldor Brynjulvson Løne 1788-1859 frå her
g 1821 m **Margreta Rognaldsdotter Glimme** 1799-1878 frå Glimme 231/2

a Ingjerd	1821-	gm Haldor Nilsson Glimme, b. Iowa
b Margreta	1823-1849	g 1844 m Lars Person Høyland, utvandra til Amerika i 1844, b. Dane co, WI, seinare Roseville, Trail Co, ND
c Brynjulv	1825-	utv. til Am. i 1844 g1m Trina Hanson Mork. G2m ek. Marta Bryn, skreddar, b. Chicago
d Rognald b. Chicago	1827-c.1903	g 1858 m Kristi Gudleiksdotter Bø, postmann,
e Per	1829-1850	skomakar, b. Chicago
f Knut	1831-1832	
g Marta	1833-1902	gm Peder J. Husander, b. Chicago
h Knut	1835-1930	gm Margreta Knutsdotter Glimme, frå Glimme 231/2, b. Chicago og farmar i Koshkonong, Wisconsin
i Klaus	1838-1923	g1m Berta Andersdotter Alrek, frå Arnafjord i Sogn. G2m Gjertine Knutsdotter Fadnes, jord- brukar m.m., b. Stillehavskysten
j Synneva	1840-1909	gm Gulbrand Røberg, b. Chicago

Halldor var med i krigen mot Sverige som smed. Han fekk skøyte frå far sin i 1820. Han selde bruket i 1849, og familien utvandra same året til Dane co, WI, USA. Familien skreiv seg der for Henderson.

Brynjulv Andersson Ullestad 1817-1867 frå Ullestad 44/1
g 1845 m **Kari Eiriksdotter Saue** 1821-1898 frå Saue 64/1

a Anders	1846-1926	neste brukar
b Eirik	1848-1893	utvandra.til Wisconsin, USA, gm Marta Stevenson
c Knut	1848-1920	utv.til Am. i 1875, gm Sarah Stevenson, b. Wisconsin
d Nils	1851-1929	g 1883 m Kari Eiriksdotter Saue, Løno 66/4
e Olav	1853-1896	g 1880 m Ingebjørg Nilsdotter Nesheim, Løno 66/2
f Guro	1856-1937	g 1876 m byggmeister og trelasthandlar Torstein Knutson Lirhus, b. Rogne
g Barbrå	1859-	utv. til Am. 1881, g der m Lars L. Møn
h Brita	1863-1896	ugift, budde her, siste tida hjå systra på Oppkvitno

Brynjulv var først husmann på Ullestad og sidan gardbrukar på Rokne, der dei tre eldste borna vart fødde. Kring 1847 var han lensmannsdræng, og ei av oppgåvene hans var då å forseгла og opna brennevinskjelane på Voss. Han kjøpte bruket her i 1849.

Anders Brynjulvson Løne 1846-1926 frå her
g 1877 m **Ingebjørg Davidsdotter Gjeraker** 1850-1915 frå Gjerdåker 90/1

a Brynjulv	1878-1878	
b Brynjulv	1879-1901	
c Kari	1882-1969	ugift, utvandra til Amerika i 1906, kom heim att og budde på Heradsgarden, Gjerde
d Anna	1884-1969	utv. til Am. i 1908, gm Aslak Flatekvål, b. Canada
e Brita	1886-	ugift, b. Bergen og Sunnhordland
f Helena	1888-1988	utv. til Am. i 1906, gm Swan O. Hendricksen, b. Montana

Anders fekk skøyte på bruket i 1867 og var brukar til 1899. Han bygde sagbruk, men skilde det frå og selde det (66/5) i 1896. Han skilde frå fleire parsellar, og bygde hus på det han hadde att av bruket. Han selde deretter bruket til svogeren, men tok unna ein eigedom, 66/6. Der bygde han hus, dreiv med handel og budde der til 1905. Han selde småbruket i 1905 og utvandra til Amerika med to døtrer i 1906.

Nils Davidson Gjeraker 1854-1935 frå Gjerdåker 90/1
g 1883 m **Gudve Josefsdotter Bjørge** 1848-1939 frå Bjørge 175/1

a Anna Berta	1883-1942	ugift, gardsarbeidar, b. her
b David	1886-1966	g 1921 m Berta Ivarsdotter Geitle, gbr. Gjerdåker 90/1
c Josef	1888-1978	neste brukar
d Brita Maria	1890-1960	g 1934 m em. Olav Monsson Steinsland, gbr. Høyland 68/1

Nils og huslyden budde i 14 år som misjonærar i Afrika, i Natal og deretter i Zululand. Dei to eldste borna vart fødde i Natal og Josef i Zululand. Brita Maria vart fødd på Oppkvitno. I 1892 kjøpte Nils ein eigedom på Palmafossen, bygde hus og starta handelsforretning med bakeri. Her var han eigar til 1903. I 1899 kjøpte han bruket her av svogeren, og familien vart sidan buande her. Fleire parsellar av bruket vart frådelt og selde. Nils var brukar til sonen overtok.

Josef Nilsson Gjeraker 1888-1978 frå her
g 1911 m **Ingjerd Arnfinnsdotter Almeland** 1890-1968 frå Oppkvitno 81/6

a Gudveig	1911-1993	g 1932 m gbr. Lars Ivarson Løne, Løno 67/1
b Hjørdis	1912-1991	g 1942 m gbr. Olav Brynjulvson Løne, Løno 67/2
c Nils	1913-1986	gm Torbjørg Kristina Evensen, Gjerdåker 90/13
d Ingjerd	1915-2009	g 1942 m skiferarbeidar og småbr. Lars Andersson Draugsvoll, Kyte 104/31
e Anna	1917-2007	g 1944 m NSB-tilsett/ småbr. Halle Brynjulvson Løno, Løno 66/13
f Arnfinn	1919-1991	g 1950 m Gudrun Haldis Steine, verkstad- snikkar, Skulestadmo (50/52)
g Lars	1921-2005	gm Margit Johannesdotter Tvinde, hotelleigar, b. Balestrand
h David	1924-	neste brukar
i Thorleif	1926-2015	g 1952 m Synneva Hansdotter Øvsthus, industriarbeidar, Ringheim 51/42
j Sigmund	1929-1996	g 1959 m Aslaug Arentsdotter Midtbø, butikk- og kontormedarbeidar, Saue 64/24
k Bergfrid	1931-	g 1953 m gbr. Ivar Knutson Dymbe, Dukstad 85/6

Josef overtok bruket i 1912, men fekk tinglyst skøyte seinare. Han var brukar til sonen overtok. Josef arbeidde i mange år som oppkjøpar for ei trelastforretning.



Tunet på Løno 66/1. Foto: Svein Ulvund

David Gjeraker 1924- frå her
g 1952 m **Gunnhild Midtbø** 1929- frå Løno 66/12

a Svein Josef	1953-	gm avdelingsleiar i bank, Lise Christine Pedersen, kontraktsleiar, b. Fana
b Kari	1954-	gm lensmannsbetjent Edvin Kaldestad, hjelpepleiar, Skulestadmo 53/14
c Asle	1957-	g 1979 m sjukepleiar Grete Fjærestad, gbr. Ringheim 53/1
d Nils	1960-	neste brukar
e Ivar	1964-	g 1986 m Anna Hefte, vaktmeister, Nesheim 80/5

David overtok bruket i 1955. David og Gunhild dreiv Ringheim gnr. 53 i mange år fram til 1994, då sonen overtok.

Nils Gjeraker 1960- frå her
g 1982 m **Karin Akerlie** 1962- frå Raugstadvegen e.o
g 2003 m **Björg Dale** 1962- frå Lundarosen, Voss

a Mari 1982- sb med anleggsarb. Svein Haug, lektor, b. Gjelle

b Anja	1985-	gm bedriftsleiar Øyvind Jensen, frå Os, lærar, b. Oslo
c Rune	1987-	gardbrukar og naudslaktar, b. her

Nils overtok bruket i 1992. Han er gardbrukar og anleggsarbeidar, og Bjørg er konsulent. Nils og Karin har borna a-c.

Løno 66/2 (Myrane)

Frådelt bruk 1 i 1884

Kring 1960 var her 15 dekar dyrka jord og noko anna jordbruksareal. Dei hadde då 2 kyr, 2 griser og 7 sauer. Bruket har beiterett i Vestre Løno si utmark. Jakob Løne, f. 1925, overtok bruket etter onkelen, og han hadde dalasau. Av og til leigde han hest av naboane. Litt seinare kjøpte han ein tohjulstraktor som han nytta i slåttan og til køyring. Graset vart hesja eller turka flatt viss vêret tillet det. Jakob dyrka heile tida poteter.

Systra til Jakob, Ingeborg, f. 1928, og mannen Erling, budde her i fleire år, og dei hjelpte til med gardsdrifta. Noko av graset vart frakta til bruket dei dreiv på Ringheim og nytta der. Våningshuset vart bygt i 1888, og det vart i slutten av 1950-åra godt utnytta. Brynjulv, som eigde bruket, hadde stove mot nordaust. Broren Eirik og sønene hans, Olav og Jakob, og dottera Ingeborg med mann og born, hadde stove mot sørvest, og dei hadde felles kjøkken.

Ingeborg og Erling bygde nytt bustadhus på Løno i 1997/98, og dei hadde då 45 vinterfora spelsau på bruket. Sauene var om sommaren på beite i Kvasdalen ovanfor Myrkdalen. Ingeborg og Erling dreiv bruket til 2012/2013. Dottera Elfrid overtok etter foreldra. Det fyrste året vart graset lagra i siloballar og køyrt til hennar og mannen sitt gardsbruk på Os. Frå 2015 har jorda vorte pakta bort til ein nabo.

Nils Brynjulvson Løno, f. 1851, frå Løno 66/1 g 1883 m **Kari Eiriksdotter Saue**, f. 1860.

Nils fekk dette bruket på Lønamyrane i 1885 av bror sin. Det vart bygt hus her. Nils dreiv bruket nokre år. I 1891 fekk han ein større gardpart av broren, bruk 4, og familien budde sidan der. Dette bruket selde Nils vidare til broren, Olav. Sjå 66/4 om familien til Nils.

Olav Brynjulvson Løne 1853-1896 frå Løno 66/1
g 1880 m **Ingebjørg Nilsdotter Nesheim** 1860-1938 frå Nesheim 80/1

a Kari	1881-	utvandra til Amerika i 1902
b Nils	1883-	utv. til Am. i 1902
c Guro	1886-	utv. til Am. i 1905
d Brynjulv	1890-1964	neste brukar
e Anders	1892-1980	g 1922 m Gjørgina Andersdotter Humlebrekke, småbrukar og hellebergsarbeidar, Løno 66/11
f Eirik	1896-1974	budde her, sjå nedanfor

Olav fekk skøyte på bruket i 1896. Han dreiv mykje med krøterhandel.

Brynjulv Olavson Løne 1890-1964 frå her

Brynjulv overtok drifta i 1910. Han fekk skøyte i 1936 og var eigar til 1963.

Eirik Olavson Løne 1896-1974 frå her
g 1923 m **Brita Jakobsdotter Skutle** 1900-1955 frå Midtre Skutle 178/4

a Olav	1924-2005	ugift, møbelsnikkar/ anleggsarbeidar, b. her
b Jakob	1925-1995	neste eigar
c Ingeborg	1928-	sjå nedanfor

Eirik var skiferarbeidar, og han arbeidde på anlegg. Olav var ein del borte på anlegg. Han bygde seg hytte i Framfjorden, Vik og var der ein del i seinare år.

Jakob Eirikson Løne 1925-1995 frå her

Jakob overtok bruket etter farbroren i 1963. Han var òg industriarbeidar/smed og arbeidde ved industribedrift i Skulestadmo.

Ingeborg Løne, f. 1928 g 1952 m **Erling Fagerbakke**, f. 1927.

Dei budde her i fleire år. Dei fekk borna Elfrid, f. 1952, Einar, f. 1956, Olaug, f. 1961, Bjørg, f. 1965, Bjarne, f. 1967 og Inge, f. 1972. I 1974 overtok dei eigedomen etter Ingeborg sin bror. Dei dreiv Ringheim 51/3 i mange år. Sjå der om familien.

Elfrid Moberg, f. 1953, frå Ringheim 51/3.

Elfrid overtok eigedomen etter foreldra i 2011. Ho er gift med Eivind Moberg og busett på Os.



Eirik O. Løne med ei telemarksku, kring 1960. Foto: Elfrid Moberg, Os

Løno 66/3 (Blikberget)

Staden var opphavleg eit husmannsplass, men vart frådelt bruk 1 i 1847. I 1901 vart bruk 7, ein teig på austsida og ein på vestsida av E16, frådelt og selde. I 1928 vart ein større teig på austsida av E16, bruk 15, frådelt og seld.

Kring 1960 var her 20 dekar dyrka jord og noko anna jordbruksareal og utmark. Dei hadde då 3 kyr, gris og 17 sauer. Det var stølsrett på Bergsstølen som ligg i fjellsida under Lønahorgi/Svartahorgi. Det var drift på småbruket fram til 1970. Dei siste åra var her berre sauer. Tidlegare hadde dei ei tid òg hest.

Dei hadde ein tresilo attmed løa, og ein del av graset vart lagt i den. Resten av graset vart turka. Sommarstida beita sauene ved Bergsstølen. Det vart kjøpt tohjulstraktor i 1954. Etter 1970 vart jorda leigd bort og til slutt seld til Løno 67/1. Stølstræet på Bergsstølen vart samtidig selt til Løno 66/1. Husa på bruket vart då frådelt og fekk bruksnummer 23.

Per Eirikson Blikberget c.1648-1744

g2 1724 m **Ragna Larsdotter Hallsteinsberg** c.1664-1741

a Anders c.1679-1766 g 1717 m Brita Nilsdotter Fletre, Hallsteinsberg

b Eirik c.1689-

c Knut c.1692- ein son Lars, sjå Hallsteinsberg

d Berge c.1698-1778 neste plassmann

Per var husmann her kring 1700.

Berge Person Blikberget c.1690-1778 frå her

g 1725 m **Brita Larsdotter Høyland**

g 1774 m **Ingebjørg Nilsdotter Løne** c.1700-1801 frå Sausjord, Vossestrand

a Ingebjørg g 1751 m Lars Åmundson Saue, Flatekvål, sidan Fagnastøl

Berge vart truleg først gift 1718 med Sigtrud Sjursdotter Rio. Han var då enkjemann. Ingebjørg gifte seg opp att, sjå nedanfor.

Ek. **Ingebjørg Nilsdotter Blikberget** c.1700-1801 frå Sausjord

g 1779 m **Kolbein Torgeirson Hommedal** 1741--1817 frå Hommedal, Vossestrand

g 1801 m **Guro Vikingsdotter Grjotland** 1757-1819 frå Grjotland

a Ingebjørg 1803- g 1822 m gbr. Torbjørn Eilivson Hjellen, Løkjo, Vossestrand

Abraham Jakobson Ullestad, f. 1739, frå Ullestad 45/6

Abraham var husmann. Sjå Løno 67/ husmenn

Brynjulv Halldorson Løne, 1764-1833, g2 1824 m **Ragnhild Olavsdotter Høyland**, 1783-1848.

Brynjulv var gardbrukar på bruk 1, men han og kona kom hit då han let hovudbruket til son sin. Det har vorte sagt at Ragnhild måtte som enkje flytta frå plassen av di ho ikkje hadde betalt leiga. Dei meinte òg at ho dreiv med trolldom, og Halldor, son til Brynjulv, betalte ho for å flytta bort.

Lars Larsson Hegle, f. 1823, frå Hegle 83/ husmenn g 1846 **Sigrid Larsdotter Gjerskvål**, f. 1818.

Lars var smed. Han kjøpte bruket her i 1847 og vart dermed sjølveigar. Familien budde her til 1852 og deretter ei tid på Helland, Bordalen. I 1867 kjøpte Lars Håtveiti 168/1. Sjå der om familien.

Aslak Knutson Grevle 1821- frå Grevle 57/1
g 1851 m **Kari Eiriksdatter Nyre** 1822- frå Nyre 195/ husmenn

a Knut f. 1851, b Eirik f. 1853, c Johannes f. 1855, d Rannveig f. 1858, e Ragnhild g.1858, f Ingebjørg f. 1861, g Jorunn 1864-1864

Aslak kjøpte bruket av førnemnde eigar i 1852. Han selde det i 1867, og familien utvandra då til Amerika.

Odd Knutson Herre 1835-1907 frå Herre 208/ Husaplasset
g 1867 m **Orlog Ivarsdatter Løne** 1832-1907 frå Løno 67/4

s Marta 1868-1938 neste brukar
b Sigrid 1873-1961 g 1902 m Anders Mattisson Mølster, Løno 66/10

Odd kjøpte bruket av førnemnde eigar. Han dyrka mykje på garden og var god smed. Han arbeidde mykje kistelås, dørlås, sakser m.m. og fekk premie ved utstilling på Vangen. Han brukte etternamnet Blikberg.

Marta Oddsdatter Blikberg 1868-1938 frå her
g 1899 m **Tomas Olavson Hernes** 1872-1954 frå Hærnes 402/ plassen
Naustviki

a Olav 1900-1985 neste brukar
b Odd 1902-1980 sjømann, reiste til Amerika, men kom tilbake, Løno 66/10
c Torgeir 1905-1994 g 1932 m Åsta Petrine Pedersdotter Benjaminsen, frå Velfjord, gardsstyrar, b. Lillehammer
d Olina 1906-1986 ugift, syerske, b. Lillehammer, seinare i Lundarosen, Voss
e Anders 1908-1924
f Ivar 1916-1991 g 1944 m Ragnhild Olavsdatter Ødegård, gbr. Øyjordi 351/1, Vossestrand

Tomas var snikkar og dreiv mykje med hellebenker. Han budde på Vangen ei tid, men flytte hit i 1907 og dreiv bruket til sonen overtok. Tomas hadde i åra 1909-1929 skøyte på bruk 7.

Olav Tomasson Blikberg 1900-1985 frå her
g 1937 m **Jenny Dortha Kristiansdotter Fagerbakk** 1902-1989 frå
Velfjord i Nordland

a Else Marie	1942-	g 1963 m Hans Skjervheim, frå Skjervheim 279/2, b. Bergen
b Kristian	1945-	g 1966 m Kjellaug Gjerskvål, frå Gjerdskvål 60/2, b. Bærum

Olav fekk skøyte på bruket i 1929. Han var utdanna agronom og arbeidde som gardsstyrar på ein stor gard i Hof i Vestfold før han flytte heim og overtok drifta her. Olav var òg overassistent i fjøskontrollen og hadde ein revisorjobb i trygdekassen. I 1944 kjøpte han tilleggsjord, Saue, bruk 13.

Kristian Blikberg, f. 1945, frå her
Kristian fekk skøyte i 1974.

Kristian var ingeniør og bur i Bærum, og det var faren som styrde med gardsbruket. I 1996 vart husa frådelt den dyrka marka, og husa fekk bruksnummer 23. Den dyrka marka, bruk 3, vart seld til gardbrukar Ivar L. Løne, Løno 67/1. Ein skogateig i Lønamarki vart seld til Nils Gjeraker, Løno 66/1.

Geir Løne, f. 1971, frå Løno 67/4 overtok 66/3 og 64/13 i 2018.

Løno 66/4

Frådelt bruk 1 i 1891

I 1891 overtok Nils Brynjulvson Løne, f. 1851, gamletunet på bruk 1 og ein større del av bruket. Dette vart bruk 4, og det låg nord for elva Breimo. Tidlegare, i 1885, fekk han ein mindre del av bruk 1. Dette vart bruk 2. Nils kjøpte 66/9, Tranaholmen i 1905, og i 1924 fekk han skøyte på ein større eigedom nord for elva, Løno 66/14. Tre av borna til Nils overtok bruket og dreiv det fram til kring 1955. Jakob D. Hus, frå Kinsarvik, barnebarn av Nils kjøpte bruket i 1957. Han slo bøane og frakta fôret til sin gard i Kinsarvik. Husa vart rivne etter eigarskifte i 1978.

Nils Brynjulvson Løne 1851-1929 frå Løno 66/1
g 1883 m **Kari Eiriksdotter Saue** 1860-1939 frå Saue 64/1

a Kari	1883-1943	ugift, hushalderske, b. her
b Eirik	1884-1971	neste brukar
c Brynjulv	1887-1888	
d Torbjørg	1890-1973	g 1910 m gbr. Daniel Jakobson Hus, b. Kinsarvik
e Olav	1896-	neste brukar
f Brynjulv	1896-1896	
g Ingebjørg	1897-1898	

Nils fekk skøyte på bruket i 1891 av broren Anders. Nils dreiv bruket til han døydde. Han dreiv òg med skyssing og skiferarbeid.

Kari Eiriksdotter Løne, f. 1860.
Etter at Nils døydde, sat kona Kari i uskifta.

Eirik N. Løne, f. 1884, **Torbjørg Hus**, f. 1890 og **Olav N. Løne** f. 1896, frå her.

Dei tre borna overtok bruket etter mora og dreiv det til 1955.

Ivar E. Jordalen, f. 1915, frå Jordalen
Ivar fekk skøyte på bruk 4,9 og 14 i 1955.

Jakob D. Hus, f. 1911, busett i Kinsarvik

Jakob kjøpte bruket i 1957. Han var son til Torbjørg Hus og budde i Kinsarvik. Han slo bøane her og frakta fôret til sin gard i Kinsarvik. Etter fleire odelssaker vart bruket selt som tilleggsjord til bruk 67/1.

Ivar L. Løne, brukar på 67/1.
Etter fleire odelssaker fekk Ivar kjøpa bruket.

Geir Løne, f. 1971, brukar på 67/1
Geir overtok eigedomen i 2018.

Løno 66/6 (Moheim)

Eigedomen vart frådelt bruk 1 i 1898. Bruket har beiterett i Løno gnr. 66 si utmark. Det gamle våningshuset vart påbygt i 1949. Kring 1960 var her 14 dekar dyrka jord og 2 da. anna jordbruksareal. Dei hadde då 1 ku, 8 sauer og 2 griser. I den tida var det vanleg at dei slakta sauene sjølv, men dei leigde folk til å slakta grisen.

I seinare år slo dei litt på naboeigedomen mot vest, og då var dei på det meste opp i 25-30 vinterfora dyr. Dei hadde ein liten traktor og motorslåmaskin, og ein del av graset vart lagt i silo. I seinare tid vart det sett opp ein ny bygning. Den vart nytta til sauene og seinare som verkstad og garasje. Det var sauer på bruket fram til 2012.

Anders Brynjulvson Løne, f. 1846, g 1877 m **Ingebjørg Davidsdotter Gjeraker**, f. 1850.

Anders eigde bruk 1 1867-1899. Då selde han bruket, og familien flytte hit. Bruk 8 vart frådelt i 1901. Han bygde hus her, og familien budde her til 1905. Då vart eigedomen seld, og Anders og to døtrer utvandra til Amerika i 1906. Sjå Løno 66/1 om familien.

Olav Knutson Mørkve 1871-1934 frå Mørkve, Vossestrand
g 1899 m **Gjertrud Oddmundsdotter Sausjord** 1868-1961 frå Sausjord,
Vossestrand

a Knut	1899-1922	ugift, budde her
b Oddmund	1901-1979	ugift, budde her
c Sjur	1902-1935	ugift, b. her
d Olav	1905-1992	neste eigar
e Anders	1908-1989	g 1933 m Marta Eiriksdotter Rogne, b. Rognshjellane
f Maria	1910-1989	eigar her, sjå nedanfor
g Nils	1910-2002	gm Sofie Andrine Palm, Løno 67/3

Olav kjøpte bruket i 1906. Han var skiferarbeidar.

Olav Olavson Mørkve 1905-1992 frå her

Olav overtok bruket etter foreldra i 1949 og var eigar til 1951. Han flytte sidan til Ullensvang og gifte seg i 1937 med Rebekka Aga.

Maria Olavsdotter Mørkve 1910-1989 frå her
gm **Kristian Karlsen** 1904-1997 frå Mysen

a Gunnar	1940-	neste eigar

b Erna	1947-	gm kommunetilsett Tom Hultgren, hjelpepleiar, b. Floda, Sverige
c Marit	1948-2011	g 1968 m sveisar Sverre Haga, reinhaldar, Skulestad 58/102
d Karin	1953-	gm Bjørn Skorve, e.o, b. Voss

Kristian kjøpte bruket av førre eigar. Han arbeidde m.a. på sagbruk.

Gunnar Karlsen 1940- frå her
gm **Björg Hylland** 1940-2017 frå Saue 64/4

a Mariann	1966-	gm IT-konsulent Johnny Sørensen, frå Oslo, rekneskapsmedarbeidar, b. Oslo
b Steinar	1967-	gift, bedriftsleiar, b. Bryn
c Kjersti	1972-	gm prosjektleiar Jan Tore Sagbakken, frå Lillehammer, rekneskapsmedarbeidar, b. Lillehammer

Gunnar var bussjåfør. Han overtok eigedomen i 1972. Steinar overtok i 2009.

Løno 66/7 (Stuebakken)

I 1901 vart det frådelt bruk 3 eit jordstykke på vestsida av E 16, oppe i bakken, og eit jordstykke på austsida av E 16. Teigane fekk bruksnummer 7. I 1908 vart teigen på vestsida frådelt, og han fekk bruksnummer 10.

Tomas O. Hernes, f. 1872, hadde skøyte på bruksnummer 7 frå 1909 til 1929. Sjå 66/3 om han.

Sigvald J. Saue, f. 1896, frå Saue 64/ plassen Kattarna

Sigvald kjøpte denne eigedomen i 1929. Han kjøpte i 1928, ein større teig på austsida av E16, bruk 15, frådelt bruk 3 i 1928, og dei to eigedomane vart drivne saman. Han tok til å byggja hus, men vart tretta ut att. Han kjøpte i staden Æn 62/9. Sjå der om familien.

Sigrid Oddsdotter Mølster, f. 1873, busett på Løno 66/10

Sigrid var dotter til eigaren av bruk 3, og ho overtok bruk 7 og bruk 15 etter odelssøksmål i 1930.

Mattias Andersson Mølster, f. 1904, frå Løno 66/10 g 1946 m **Konstance Marie Møller**.

Mattias overtok eigedomane etter mora i 1961. Han og kona budde i Oslo. Anders Mølster, son til førre eigar, overtok eigedomane etter foreldra. Han skøyte i 2017 eigedomane vidare til dottera, Helene Mølster Bygland.

Løno 66/8 (Solhaug)

Staden var opphavleg eit husmannsplass. Eigedomens vart frådelt bruk 6 i 1901, og våningshuset vart bygt i 1902. Kring 1960 var her 12 dekar dyrka jord, og dei hadde då 1 ku, 3 griser og 6 sauer.

Olai Olavson Myklebust 1869-1910 frå Jølster
gm **Pernille Olavsdotter Grimsbø** 1866-1916 frå Jølster

- | | | |
|------------------|-----------|--|
| a Olav Nikolai | 1891- | skiferarbeidar |
| b Olaf Martin | 1893-1986 | g 1920 m Anna Larsdotter Flatekvål, arbeidar, b. Ålvik, som pensjonist ved Rognsfossen |
| c Johannes Elias | 1896-1973 | g 1920 m Malena Andersdotter Sundve, skiferarbeidar, Høyland 68/4 |
| d Kristine Oline | 1898-1922 | gm småbrukar Arne Nyborg, b. Toten |
| e Inga Hanna | 1903-1903 | |

Dei budde her frå 1895 og utover. I 1901 kjøpte Olai bruket. Han og sønene var skiferarbeidarar kring 1910. Eldste sonen vart fødd i Jølster, den neste i Naustdal og dei andre her.

Samson Johannes Larsson Horvei 1858-1939 frå Kinn i Sunnfjord
g 1884 m **Barbrå Helgesdotter Bolstad** 1863-1961 frå Evanger

- | | | |
|-----------|-----------|---|
| a Kari | 1885- | utvandra til Minnesota, USA i 1904 |
| b Lars | 1887-1968 | b. Voss, til sist på Heradsgarden |
| c Helge | 1888- | utv. til Minnesota, USA i 1911 |
| d Andreas | 1891-1977 | g 1920 m Ingebjørg Knutsdotter Overland. G 1931 m Marta Olavsdotter Flisram, småbrukar Hegle 83/3 |